

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Il dossier dal Centri European di Ricercje Mercator

Pal furlan a scuele al covente un impegn plui concret



I dâts a mostrin cemût che,
intal an scolastic 2022-2023,
a son stâts 26.285 i students
che a frequentavin lis lezions
di furlan tra lis scuelis
de infanzie e primariis

Serena Fogolini

A son stâts trê zornadis sioris di confronts e di riflessions, chés dai 11 ai 13 di Avrîl, che a ãn viodût la presentazion dal dossier "La lenghe furlane tal sisteme educatif italiano", curât di Ada Bier (Universitat dal País Basc), Gabriele Zanello (Universitat dal Friûl) e Antonella Ottogalli (Docuscuele de Societât Filologjiche Furlane) pal

Mercator - Centri European di Ricercje sul Multilinguisim e sul Aprendiment des Lenghis cun sede in Frisia (Païs Bas). La publicazion, la uniche de golaine a presentâ lis traduzions dal inglês anche par talian e par furlan, inte version di cjarte stampade de Societât Filologjiche Furlane, e salte für 10 agns daspô de prime edizion e e marche une situazion critiche pal insegnament de lenghe furlane.

I dâts, di fat, a mostrin cemût che, intal an scolastic 2022-2023, a son stâts 26.285 i students che a frequentavin lis lezions di furlan tra lis scuelis de infanzie e primariis dal Friûl Vignesie Julie suntun totál di 56.908 students, par une percentuâl dal 46,74%. Percentuâl che e je restade sù par jù stabile rispet a dîs agns indaûr, aben che si sedin sbassâts i numars assolûts (in ché volte 32.130 students su 68.749). La ex provincie di Udin in di di vuê à il 76% di students che a sielzin di frequentâ lis lezions di furlan. La percentuâl si sbasse al 17% a Pordenon e al 8% a Gurize. Lis trê zornadis di presentazion dal

dossier a ãn permetût di condividi ideis e propuestis tra diviers publics di int dal setôr, sticant un dibatiment prezios su cemût miorâ il sisteme in funzion ore presint.

Il prin apontament al è stât a Udin joibe ai 11 di Avrîl intal Pôl de Formazion de Universitât, cuntune cunvigne indreçade soredu ai students e ai docents universitaris. E je stade la ocasion par presentâ il percors che al à puartât ae realizazion dal dossier, in part risultât dal proget "FURLEUS" di Ada Biér, finanziât dal program di ricerce e inovazion Horizon 2020 de Union Europeane cuntune borse di ricerce Maria Skłodowska-Curie ospitade de Universitat dal País Basc. Cun di plui, al è stât presentât anche l'operât dal Centri Mercator, in gracie dal intervent di Charlie Robinson-Jones.

In chescj dîs agns, tancj a son stâts i sfuarçs e i travuarts par favorî l'insegnament de lenghe furlane, cun percors di formazion academiche specifics, tant che il Curriculum pal insegnament in lenghe e culture

furlane, publicazions su la fonde di metodologjis incredatidis pal aprendiment des lenghis e la creazion di un Centri regionâl di documentazion, ricerce e sperimentazion didatiche pe scuele furlane (Docuscuele). Tantis, dut câs, a son ancjmò lis dificoltâts, anche par vie de opzionalitât di insegnament e pe mancance di une ufierte continuative dilunc di dut il percors scolastic (la propueste dal insegnament par almancul trente oris ad an si ferme ae secondarie di prin grât).

Propit di chescj problemis si è fevelât vinars ai 12 di Avrîl in Palaç Belgrât a Udin, intal incuintri promovut de Assemblee di Comunitât Linguistich Furlane, in colaborazion cun ARLeF e Region. Il president de ACLiF, Daniele Sergon, al à marcât che l'insegnament de lenghe furlane al è leât a strent al teme de autonomie scolastiche. Par sierâ, sabide ai 13 di Avrîl a Codroip i dâts a son stâts presentâts ai insegnants, inte XI Zornade de Scuele furlane, promovute dal Docuscuele. La matinade e à dât vite a un confront vivarôs: se di une bande e confuare la presince di struturis di alte qualitât pe formazion dai docents e pe realizazion di materiâl didatics, di ché altre no si pue ignorâ che tant al sedi ancjmò di lavorâ par promovi l'insegnament de lenghe furlane, soredu tra i gjenitôrs e i adults.



Si presente il volum "Scrivere in friulano"

La iniziative vinars ai 19 di Avrîl, aes 5 e mieze daspô misdi, a Guriza, te sale Incuintri de Parochie di Sant Roc

Vinars ai 19 di Avrîl, aes 5 e mieze daspô misdi, a Guriza, te sale Incuintri de Parochie di Sant Roc in vie Veniero 1, Federico Vicario, president de Societât Filologjiche Furlane e docent di linguistiche inte Universitat dal Friûl, al presentarà il volum "Scrivere in friulano. Lingua comune e varietà locali" di Paolo Roseano e Anna Madriz, publicat che nol è tant de Filologjiche. La iniziative e je in colaborazion cul

Comun di Guriza, cu la Unitât Pastorâl "Porta Aperta" - Guriza e cul Centri pe Conservazion e Valorizazion des Tradizions Popolârs di Borc Sant Roc, cu la poie de Casse Rurâl dal Friûl Vignesie Julie. E je une gnove edizion de vuide di succès publicade de Societât Filologjiche Furlane. Il volum al da indicazions par scrivi par furlan, doprant la grafie uficial de lenghe furlane. Il libri al è anche un gnûf imprest descrift de lenghe

furlane, une gramatiche gnove. E je stade dedicade atenzion sedi aes regulis de lenghe, sedi aes ecezions e ai câs particulârs che le insior.

La lenghe presentade dai doi autôrs e je ché comun, la lenghe inlidrisade inte miôr tradizion leterarie furlane, ma tal stes temp atente e vierte ai contribûts des varietâts locâls.

Il volum, nassût anche in gracie de colaborazion e dai conseis dai insegnants dai cors pratics di lenghe furlane metûts in pîts de Societât Filologjiche, al è indreçat soredu ai utents dai cors. Cheste edizion e je insiorade cu lis indicazions par scrivi intes diviversi varietâts geografichis de lenghe furlane.

Vie pal incuintri a saran anche dâts fûr i atestâts di partecipazion dal cors pratic di lenghe e culture furlane inmaneât a Guriza.

La jentrade ae presentazion e je libare, fin che al è puest. Par informazions si pue contatâ la Societât Filologjiche Furlane al 0481 533849, direzion di pueste elektroniche gorizia@filologicafriulana.it.

Paolo Roseano • Anna Madriz

13

